



Musicants da Sagogn ella concurrenza da marschar.



Il president niev dall'uniun cantunala, Andy Kollegger (seniester), all'emprema fiasta en sia funcziun, ensemen cun Jörg Padrutt, commember dalla suprastanza cantunala.



Ernst Sax, president communal e president dil comite d'organisaziun, durant siu cuort plaid, enraus dallas damas d'honor.



Rafael Camartin ha dirigiù il toc «Obersaxen» ch'el ha cumponiù sco toc general per la 20avla fiasta districtuala.



La musica da Vétroz el til, sin via per las producziuns comunablas.



Las bandieras, requisits impurtants dalla fiasta. Sut la bandiera serimnan ils musicants.

FOTOS K. SCHNIDER

## Ina fiasta cun melli experts

La 20avla Fiasta da musica sursilvana a Sursaiassa ei stada in success cumplein

DAD AUGUSTIN BEELI / ANR

■ Per l'emprema gada ha la **Societad da musica da Sursaiassa envidau las musicas sursilvanas ad ina fiasta districtuala. 17 societads han dau suatientscha agli invit dalla fin d'jamna. Igl ei stau ina fiasta giubilara, numnadamein la 20avla.** Cun agid da 200 gidonters ha il comite d'organisaziun saviu porscher ina sentupada fetg gartegiada. Las duas parts cullas concurrenzas toc d'elecziun e marschar ei stada concentrada silla sonda. La dumengia han ils da Sursaiassa envidau ad in solver cun surversch divin e concert da gala dalla musica da classa superiura da Vétroz ella Part sut dil Valleis.

Conta glieud exact ch'ei separticipada alla fiasta ha il secretari dil comite d'organisaziun, *Ivan Vinzens*, buca saviu gir. En sia funcziun sco president dil District da musica Surselva ha el tuttina giu la survesta, el ei staus persuna da clav e da contact enteifer il comite d'organisaziun. Perinagada ei il parcadi dallas pendicularas aunc mai staus occupaus talmein cun autos. Las 17 societads ch'ei separticipadas alla fiasta ein vegnidas cun rodund 600 musicantas e musicants. Vitier ein silmeins aunc melli persunas stadas sonda a Sursaiassa. Il president dil comite d'organisaziun, president communal *Ernst Sax*, ei staus fetg satisfatgs digl'entir andament e dils resuns positivs ch'el ha retschert. Cunzun eis el zun cuntents

culla prestaziun collectiva dalla populaziun da Sursaiassa. Senza igl engaschi dils 200 gidonters fussi ei buca stau pusseivel d'organisar quei eveniment. Secapescha ch'el ei era staus engrazievels a sogn Pieder. Las prognosas havevan buc annunziat bialaura. Ch'igl ei stau schetg igl'entir gi e quei cun temperaturas emperneivlas han participonts e visitaders apprezziau fetg.

Sco experts dils tocs concertonts ein *Carlo Balmelli* (TI) e *Pascal Eicher* (NE) stai en funcziun a Sursaiassa e sco experts dalla part da marschar *Josef Fink* (AG), *Heinz Binder* (AG) ed *Ivo Mühleis* (SG). Tuts han procurau per concurrenzas objectivas e resultats indubitabels. 14 societads sursilvanas e treis hospitantas (Vétroz, Vaz sut e Künsnacht) han mussau prestaziuns ch'ils experts han giudicau suandontamein: «Tier tuttas formaziuns constatein nus ina lavur da basa beintgirada.» Ad els seigi denter auter era dau en egl ch'igl auditori seigi separticipaus stedi allas producziuns. Tier biaras concurrenzas da musica giudicheschon ils experts en salas miezvittas ni senza auditori. En Surselva han els tratg la conclusiun che la musica gauda gronda accoglientscha. En lur rapport han els intimau las musicas da tgirar vinavon quella buna tochen excellenta qualitat da far musica.

Il comite d'organisaziun ha era saviu selegrar ch'igl ei gartegiad da setener exact vid igl urari stretg. Quel ha entschiet allas 08.30 culla musica da Val S.

Pieder ella zona da silenzi a Cuort/Meierhof ed ei setratga viaden el suentermiezgi tochen las 16.05 culla musica da Vignogn ella concurrenza da marschar. Lezza ha giu liug a Vivèr/Affeier sil toc grad dalla via cantunala. Per transportar la glieud denter ils dus loghens haveva il comite semtgau bus pendulars, quei che ha funcziunau perfetg.

Alla 20avla Fiasta da musica districtuala sursilvana ei era la suprastanza dall'Uniun cantunala da musica dil Grischun separticipada. Pil president *Andy Kollegger* eis ei stau l'emprema fiasta en sia funcziun sco president cantunal. El ha engraziu allas musicantas ed als musicants per lur engaschi a favur da quei scazi cultural grischun. «Vus essas la petga centrala da quei scazi», ha el manegiau. Denter las musicas participontas han ins s'encurschiu talas cun ambiuziuns. Tier quellas s'audan las treis musicas sursilvanas ch'ei era la secunda classa. Suenther Vignogn ein las musicas da Falera e Sagogn separticipadas per l'emprema gada en quella. Cun ina prestaziun indubitabla ha la musica da Sagogn persquadiu. Per siu toc d'elecziun «Thyellene» ha ella retschert 95 da 100 puncts. Las musicas da Vrin, da Stussavgia e da Sedrun ein separticipadas alla fiasta districtuala cull'ambiziun da far musica, da represenstar e guder la cumpignia. Ella tiarza classa ha la musica da Flem selegrau. Ella ha gudignau la concurrenza ella tiarza classa.



Sin tribuna ei la Societad da musica Breil/Dardin en acziun.